



Bentiaraq Ottosen

UKA 2023/130

Atassut

28. september 2023

Utoqqalinermi soraarnerussutisiat akileraarutaasarunnaarnissaannut periarfissat pillugit Naalackersuisut nalunaarusioqqullugit peqquneqarnissaannik inatsisartut aalajangiiffigisassaattut siunnersuut.

(Inatsisartuni ilaasortaq Aqqalu C. Jerimiassen, Atassut)

Ukiut tamarluinnaasa kalaalerpassuit utoqqalinersiallit Danmarkimut nuuttarput. Atugassarititaasut pitsaanerummata, utoqqarnullu utoqqalinersialinnullu ataqqinninnerummata. Ajoraluartumillu nunatsinni soraarnerussutisiallit nunatta karsianut aningaasannanniarfittut isiginnittaaseqalersimavugut. Tupinnangilaq pitsaanerumik atugaqarusullutik aallartarmata.

Inuunerpummi tamaat sulisussatut naatsorsuutaavugut. Ilinniagaqarnissaq naatsorsuutaavoq. Sulileruttalu pinngitsaaliissummik soraarnerussutisiassanut akiliisarnissaq pinngitsaaliissutaalluni. Suligutta suligutta akissarsiattalu affangajai akileraarutigereerlugit sinnimininngui pinngitsaaliissummik ileqqaarutigigigutsigit, utoqqalilerluta tigusussanngorutsigit aamma qaavatigut akileraarutigalutigit.

Paasinarpoq partiit allat Atassut utoqqaat partiattut illuaruaatiginninniartutik taasarmassuk. Nammineerlutik utoqqarnik ataqqinninngimmata, utoqqaallu nunatta karsianut iluaqutsissatut isigimmatigit. Siunissamullu takorluuilaarsinnaagussi aamma paasilissagaluarparsi nammineerlusi utoqqalisussaagassi. Immaqaluunniit Danmarkimut nuunnissaq pilersaarutaava?

Inuk qitiutillugu qanoq isumaqarsorivisiuk? Nunatta karsia qitiutillugu? Ilaa naamik. Asulimi oqaatigineq ajorparput. Inuk piunmassuseqarluni sullarissuunissaalu naatsorsuutigissagutsigu kiffaanngissuseqartariaqarpq, killilersorpallaarnagulu. Ajoraluartumimmi aappillarissuuniarnerup inuk pituttorpaa akileraartussaannartullu isigalugu.

Ukiorpaalunngortuni Atassummiit aningaasanut inatsisissamut isumaqatiginninniarnermi tamatigit kissaatigisarparput soraarnerussutisiat akileraarutaajunnaartariaqarnerat. Uanilu siunnersuummi ersarippoq siunnersuuteqartup sukumiisumik paasissutissiisoqarnissaa kissaatigigaa, kingunerisassai, aningaasatigut, taavalu taamaaliornikkut utoqqalinersiallit atugarisaat pitsanngussanersut qulaajaqquneqarlutik.

Siunnersuuteqartoq qutsavigalugu siunnersuut tamakkiisumik toqqaannartumik taperserparput. Pisariaqarsorineqassappallu ataatsimiititaliamut ingerlateqqinnissaattaaq tapersissavarput.